

《佛說鬼問目連經》

<u>No. 734 [Nos. 99(508~534)</u>, <u>745</u>, <u>746</u>]

《佛說鬼問目連經》

後漢・安息國・三藏安世高譯

聞如是:

一時,佛住王舍城迦蘭陀竹園。

爾時,目連晡時從禪定起,遊恒水邊,見諸餓鬼受罪不同。

時,諸餓鬼見尊者目連,皆起敬心,來問因緣。

一鬼問言:

「我一生以來恒患頭痛。何罪所致?」

目連答言:

「汝為人時,好以杖打眾生頭。今受花報,果入地獄。」

一鬼問言:

「我一生已來資財無量,而樂著弊衣。何罪所致?」

目連答言:

「汝為人時布施作福,還復悔惜。今受花報,果在地獄。」

一鬼問言:

「我一生已來宿無常處,恒倚巷陌。何罪所致?」

目連答言:

「汝為人時,客來投止,不肯安處;見他客止,方復瞋恚。今受花報,果入地獄。」

一鬼問言:

「我食不噉一斛,而不得飽。何罪所致?」

目連答言:

「汝為人時飯飼眾生,初不令足。今受花報,果入地獄。」

一鬼問言・

「我一生已來腹大如甕,咽細如針孔,不得下食。何罪所致?」

目連答言:

「汝為人時,作聚落主,自恃豪強,輕欺百姓,強打拍人,索好美食。今受花報,果入地獄。」

一鬼問言:

「我一生已來,恒患男根瘡爛,痛不可言。何罪所致?」

目連答言:

「汝為人時,佛圖、精舍清淨之處行於婬欲。今受花報,果入地獄。」

一鬼問言:

「我一生已來多有兒子,皆端正可喜,而皆早死,念之斷絕,痛不可言。何罪所致?」

目連答言:

「汝為人時,見兒殺生,助喜噉肉;殺生故短命,喜故痛毒。今受花報,果入地獄。」

一鬼問言:

「我一生已來,有一狗體大、牙利,兩目赫赤,常來噉我。何罪所致?」

目連答言:

「汝為人時,喜將狗獵殘害眾生,無有慈心。今受花報,果在地獄。」

一鬼問言:

「我一生已來,有一人持諸利刀,常割我肉,盡便持去;須臾尋生,而復來割,痛不可言。 何罪所致?」

目連答言:

「汝為人時,喜屠割眾生,初無慈心。今受花報,果入地獄。」

一鬼問言:

「我一生已來,恒患身體,處處皆痛,不可得忍。何罪所致?」

目連答言:

「汝為人時好漁獵,所網得魚,投之沙土,令其苦死。今受花報,果入地獄。」

一鬼問言:

「我一生已來頑無所知。何罪所致?」

目連答言:

「汝為人時,強勸人酒,令其顛倒。今受花報,果入地獄。」

一鬼問言・

「我一生已來,恒患熱渴,行見恒河,冀入其中,以除熱渴。方入其中,身體焦爛,肌肉離骨;渴欲飲之,一口入腹,五藏焦爛,痛不可言。何罪所致?」

目連答言:

「汝為人時,喜焚燒山澤殘害眾生。今受花報,果入地獄。」

一鬼問言:

「我一生已來恒患飢渴,欲至廁上取糞噉之,廁上有大力鬼,以杖打我,初不能得近。何罪 所致?」

日連答言:

「汝為人時,作佛圖主,有客比丘來,慳惜不與食;待客去後,乃行與舊僧。慳惜僧物故, 今受花報,果入地獄。」

一鬼問言:

「我一生已來恒處不淨,臭惱纏身,不能得離;飢渴之時,還食此不淨。何罪所致?」

目連答言:

「汝為人時,作婆羅門子。有一道人,中後來就汝乞食。汝爾時當作是方便,令此道人不復來乞,便取其鉢,盛糞著底,以飯覆之。道人得鉢,還至本處,著一面,澡漱既訖,攝鉢欲食,鉢中臭穢不可得近。以是之故墮在地獄,汝將來世墮糞屎彌犁地獄中。」

一鬼問言:

「我一生已來, 肩上有銅瓶, 盛滿中洋銅。一手捉銅, 杓以取之, 還灌其頭, 痛不可言。何 罪所致?」

目連答言:

「汝為人時,作僧維那知僧事。有一瓶酥,藏著餘處,不行與僧;待客去後,乃行與舊僧。 此酥是招提僧物,一切有分。慳惜僧物故,今受花報,果入地獄。

一鬼問言:

「我一生已來,或登刀山、劍樹地獄,或墮火坑、鑊湯地獄,種種受苦,無復休已。何罪所致?」

目連答言:

「汝為人時,作天祠主,烹殺三牲,祭祀天神,血肉灌灑四方。語眾人言: 『汝等祠祀,大得吉利!』

作此魔邪之言、妖充之語,輕欺百姓,誑惑父母。以是之故,果入地獄。」

一鬼問言:

「我一生以來常吞鐵丸。何罪所致?」

目連答言:

「汝為人時,作沙彌子,取淨水作石蜜漿。石蜜堅大,盜打取少許;眾僧未食,盜食一口故。 以是因緣,果入地獄,汝將來世常吞鐵丸。」

爾時,目連與諸餓鬼說往昔因緣經竟,還來在耆闍崛山。一切大會聞佛所說,稽首奉行。《佛說鬼問目連經》